



**Sumáriu Kazu
Tribunál Distritál Dili
Novembru 2022**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Dili

1. Totál kazu ne'ebé JSMP monitoriza: 23

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	8
Artigu 177 KP	Abuzu seksuál ba menór	1
Artigu 172, 173 KP no 160 KP	Violasaun seksuál ho agravasaun no sukéstru	1
Artigu 207 KP no artigu 209 KP	Kondusaun sem karta no kondisaun perigoza	1
Artigu 157 KP no artigu 252 KP	Krime ameasa no danu simples	1
Artigu 258 KP	Danu simples	1
Artigu 185 no 2 no 3, 139 (b), 23, KP no artigu 20 (1) Lei Arma Brankas	Tentativa omisídiu, violasaun ba domisíliu no arma brankas	1
Artigu 259 KP	Danu agravadu	1
Artigu 145 KP no art 20 (1) Lei Arma Brankas	Ofensa ba integridade física simples no arma brankas	1
Artigu 179 KP	Abuzu seksuál ba ema ne'ebé la bele reziste	1

Artigu 172 KP	Violasaun seksuál	2
Artigu 322 KP	Explorasaun ba jogu ilísitu	1
Artigu 145 KP	Ofensa ba integridade fízika simples	2
Artigu 252 (2) KP no artigu 303 (1) KP	Furtu simples no falsifikasaun ba dokumentu ka notasaun téknika	1
Totál		23

2. Totál desizaun ne'ebé JSMP monitoriza: 12

Tipu pena	Artigu	Númeru
Prizaun	66 KP	1
Suspensaun ba prizaun nia ezekeusaun	68 KP	4
multa	67 KP	5
Omologa pedidu dezisténsia keixa	216 KPP	1
Absolve		1
Totál		12

3. Totál kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua prosesu tuir JSMP nia monitorizasaun : 11

1. Krime ameasa no danu simples

Nú. Prosesu : 0135/21 DINFT
 Kompozisaun Tribunál : Singulár
 Juis : Dr. Ivan Patrocino Antonino Gonçalves
 Prokuradór : Dr. Osorio de Deus
 Defeza : Dr. Manuel Sarmiento husi defensoria publiku
 Desizaun : Omologa pedidu dezisténsia keixa

Iha 7 Novembru 2022, Tribunál Distritál Dili prezide julgamentu leitura sentensa ba krime ameasa no danu simples ne'ebé envolve arguidu Matias Cardozo hasoru lezada Milenia Fernandes de Carvalho, iha Munisípiu Dili.

Akuzasaun prokuradór

Prokuradór akuza katak antes ne'e arguidu ho lezada iha relasaun namoru no arguidu hakarak kontinua relasaun namoru ho lezada, maibé lezada lakohi nune'e iha 1 Setembru 2021, arguidu ameasa lezada katak "*ó la kohi hau, hau sei soke aleza ó nia ain para ó uza deit kadera roda*", la to'o iha ne'e de'it arguidu mós tuda rahun lezada nia buli cok ida, foti lezada nia aqua dos ida iha lezada nia karosa faan sasan nian hodi tuda estraga

ba iha rai, baku rahun lezada nia pop mie dos ida, supermi no foti lezada nia osan US\$25.00 no foti mós ho lezada nia pulsa, maibé lezada hadau fali pulsa husi arguidu.

Prokuradór akuza arguidu kontra artigu 157 KP kona-ba krime ameasa ho moldura penál too tinan 1 prizaun ka multa no artigu 258 kona-ba krime danu simples ho moldura penál tinan 3 prizaun ka multa.

Produsaun ba prova sira

Bazeia ba artigu 262 Nú.1 Kódigu Prosesu Penál kona-ba tentativa ba konsiliaaun, nune'e antes tama ba julgamentu produsaun ba prova, juis husu halo tentativa konsiliaaun ba arguidu no lezada.

Iha prosesu tentativa konsiliaaun ne'e, lezada hakarak dame malu ho arguidu, maibé ho kondisaun arguida tenke selu fali lezada ninia sasan ne'ebé arguidu estraga ona ho valor osan US\$500.00. Arguidu deklara katak konkorda ho lezada ninia pedidu dezisténsia keixa ne'e, maibé valor ne'ebé lezada husu ne'e liu kapasidade arguidu nian, arguidu so disponivel atu selu fali lezada nia sasan ho osan US\$150.00, ho razaun katak lezada nia sasan ne'ebé arguidu estraga ne'e la to'o US\$150.00 nia folin, alende ne'e arguidu mós la serbisu nune'e. Arguidu disponivel atu selu osan refere iha 13 Novembru 2022.

Alende ne'e lezada konkorda ho arguidu ninia pedidu ne'e atu selu fali lezada nia sasan ne'ebé arguidu estraga ona ho valor osan US\$150.00, maibé husu ba arguidu atu la repete tan ninia hahalok hanesan hasoru lezada iha futuro. Nune'e lezada husu ba tribunál atu dezisté nia keixa hasoru arguidu.

Alegasaun finál

Prokuradór ho defeza apresia akordu dame ne'ebé parte rua konkorda ona no husu ba tribunál atu omologa pedidu dezisténsia keixa ne'e.

Desizaun

Bazeia ba akordu dame husi parte rua no pedidu dezisténsia husi lezada, nune'e tribunál konklui prosesu ne'e no omologa akordu dame entre parte sira.

2. Krime ofensa ba integridade fizika simples ho natureza violénsia doméstika

Nú. Prosesu	: 0072/21 LIBZET
Kompozisaun Tribunál	: Singulár
Juis	: Dra. Ana Paula Fonseca
Prokuradór	: Dr. Napolião da Silva
Defeza	: Dr. Humberto Alves
Desizaun	: Pena multa US\$100.00

Iha 9 Novembru 2022. Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu CS hasoru nia feen, iha Munisípiu Dili.

Akuzasaun Prokuradór

Prokuradór akuza katak iha 15 Setembru 2021, iha oras tuku 19:00 kalan, arguidu tuku dala rua iha lezada nia ulun, basa dala ida iha lezada nia hasan parte karuk no rakut lezada nia kakorok. Aktu ne'e rezulta moras mean no bubu iha lezada nia ulun, hasan sorin karuk no kakorok. Antes agresaun ne'e, arguidu ho lezada diskute malu kona-ba arguidu faan manu ne'ebé sira hakiak ho folin US\$5.00 de'it, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penál tinan 3 prizaun ka multa konjuga ho artigu 2, 3 (b) no 35 (b) no 36 LKVD.

Produsaun ba prova sira

Iha prosesu julgamentu arguidu konfesa integralmente ba faktu hotu iha akuzasaun no deklarara katak komete aktu ne'e hasoru lezada, tanba lezada korize arguidu iha ema barak nia oin, arguidu mós deklarara katak hafoin akontesimentu ne'e sira diak malu fali, arguidu deklarara mós katak arrepende ona nia hahalok no promete sei la komete tan krime hanesan iha futuro.

Arguidu konfesa, nune'e prokuradór husu ba tribunál atu presinde lezada nia deklarasaun, tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada, bazei aba konfisaun arguidu nian, tanba ne'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza husu ba tribunál atu fó pena ne'ebé adekua ba arguidu ho konsiderasaun katak arguidu konfesa, arrepende ona nia hahalok, diak malu ona ho lezada no promete sei la komete tan krime hanesan iha futuro.

Desizaun

Depoisde avalia faktu hotu tribunál prova katak arguidu tuku dala rua iha lezada nia ulun, basa dala ida iha lezada nia hasan parte karuk no rakut lezada nia kakorok.

Bazeia ba faktu provadu hirak ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok, diak malu ona ho lezada no promete sei la repete tan krime hanesan iha futuro. Nune'e tribunál konklui prosesu ne'e no kondena arguidu ho multa US\$100.00 ne'ebé kada loron arguidu sei selu US\$1.00, durante loron 100. Tribunál mós fiksa pena alternativa durante loron 66 prizau. Bainhira arguidu la kumpri pena multa refere.

3. Krime ofensa ba integridade fízika simples ho natureza violénsia doméstika

Nú. Prosesu : 0047/21.LIMBR
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Napoleão da Silva
Defeza : Dr. Marcelino Marques Coro
Desizaun : Pena multa \$50.00

Iha 9 Novembru 2022, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu HS hasoru nia feen, iha Munisípiu Likisá.

Akuzsaun prokuradór

Prokuradór akuza katak iha 14 Setembru 2022, iha oras tuku 6:20 dadeer, arguidu tuku dala ida iha lezada nia oin, maibé la kona, la too iha ne'e de'it arguidu kontinua tuku dala ida iha lezada nia inus, rezulta lezada nia inus raan, metan no bubu no lezada konsege ba halo tratamentu iha kliníka Maubara. Antes agresaun ne'e, arguidu ho lezada diskute malu kona-ba arguidu ne'ebé ho kondisaun lanu tolok lezada no halo agresaun hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba provas sira

Iha prosesu julgamentu, arguidu hili direitu nonook, entretantu lezada kontinua konfirma faktu hotu iha akuzasaun no deklara katak sira di'ak malu ona.

Alegasaun finál

Prokuradór haktuir katak mezmú arguidu hili direitu nonook, maibé lezada kontinua konfirma faktu hotu iha akuzasaun, nune'e prokuradór konsidera arguidu provadu komete krime hasoru lezada, ho nune'e husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza husu atu tribunál fó justisa ne'ebé justu ba arguidu, tanba mezmú arguidu hili direitu nonook, maibé lezada deklara katak sira diak malu ona.

Desizaun

Depois avalia faktu hotu, tribunál prova katak arguidu tuku dala ida iha lezada nia oin, maibé la kona, la too iha ne'e de'it arguidu kontinua tuku dala ida iha lezada nia inus, rezulta lezada nia inus raan, metan no bubu no lezada konsege ba halo tratamentu iha kliníka Maubara.

Bazeia ba faktu provadu sira ne'e tribunal konklui prosesu ne'e no kondena arguidu ho pena multa US\$50.00, ne'ebé kada loron arguidu sei selu 0.50 sentavus, durante loron 100. Tribunál mós fiksa pena alternativa durante loron 66 prizaun, bainhira arguidu la

kumpri pena multa refere.

4. Krime ofensa ba integridade fizika simples ho natureza violénsia doméstika

Nú. Prosesu : 0168/22 PCCI
Kompozisaun Tribunál : Singulár
Juis : Dr. Alvaro M. Freitas
Prokuradór : Dra. Ivonia M. Guterres
Defeza : Dr. Henrique João Mariz
Desizaun : Pena prizaun fulan 1 suspende ba tinan 1

Iha 10 Novembru 2022, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AA hasoru nia feen, iha Munisípiu Dili.

Akuzasaun prokuradór

Prokuradór akuza katak iha 19 Feveireiru 2022, iha oras tuku 17:00 lokraik, arguidu basa dala rua iha lezada nia kanuruk no lori xave odamatan tuda lezada no kona iha lezada nia tilun hun parte loos rezulta kanek no raan sai, arguidu kontinua lori dos mamuk baku lezada nia kotuk laran rezulta moras. Antes agresau ne'e, arguidu ho lezada diskute malu kona-ba arguidu hadau lezada nia telemovel no la fó ba lezada durante loron rua, tanba lezada atu telefone lezada nia inan, nune'e lezada husu fali lezada nia telefone, ho nune'e mosu agresau ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak komete aktu ne'e hasoru lezada, tanba lezada cet ho mane seluk. Arguidu deklara mós katak hafoin akontesementu ne'e lezada ba hela ho nia inan aman no liu tiha loron rua arguidu ho nia família ba hasoru lezada nia inan-aman hodi koalia fali no arguidu husu deskulpa ba lezada, hafoin família rua tuur hamutuk rezolve, sira diak malu fali hanesan fen-laen too agora.

Alende ne'e, lezada mós konfirma faktu hotu iha akuzasaun no konfirma mós ho arguidu nia deklarasaun katak família rua rezolve ona problema ne'e no arguidu husu ona deskulpa ba lezada.

Alegsaun finál

Prokuradór konsidera arguidu provadu komete krime hasoru lezada bazei aba konfisaun arguidu nian no konfirma mós husi lezada, mezmu nune'e atu prevene krime ne'e akontese tan iha futuro, husu ba tribunál atu kondena arguidu ho pena prizaun fulan neen suspende ba tinan rua.

Defeza husu ba tribunál atu kondena arguidu ho pena admoestasaun ho konsiderasaun katak arguidu konfesa, husu ona deskulpa ba lezada, diak malu ona no arguidu pratika krime ne'e tanba lezada cet ho mane seluk.

Desizaun

Depoisde avalia faktu hotu tribunál prova katak arguidu basa dala rua iha lezada nia kanuruk no lori xave odamatan tuda lezada no kona iha lezada nia tilun hun parte loos rezulta kanek no raan sai, arguidu kontinua lori dos mamuk baku lezada nia kotuk laran rezulta moras.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, diak malu ona ho lezada no to'o agora moris hamutuk nafatin hanesan feen ho lean. Ho nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

5. Krime ofensa ba integridade fizika simples ho natureza violénsia doméstika

Nú. Prosesu : 0134/21 DIBCR
Kompozisaun Tribunál : Singulár
Juis : Dra. Ana Paula Fonseca
Prokuradór : Dra. Ivonia M. Guterres
Defeza : Dr. Humberto Alves
Desizaun : Pena prizaun fulan 6 suspendeba tinan 1 fulan 6 ho dever adisionál

Iha 10 Novembru 2022, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu APdO hasoru nia feen, iha munisípiu Dili.

Akuzasaun Prokuradór

Prokuradór akuza katak iha 20 Juñu 2021, iha oras tuku 12:00 meudia, arguidu tuku dala 10 iha lezada nia ulun basa dala barak iha lezada nia hasan no oin rezulta moras no bubu iha lezada nia ulun, hasan no oin. Antes agresaun ne'e, arguidu ho lezada diskute malu kona-ba arguidu simu tiha osan la fó ba lezada, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Arguidu iha nia deklarsaun konfesa parsial katak nia lori lezada nia liman basa dala hat iha lezada nia oin tanba antes ne'e lezada mak ba rakut no lori ai-sar baku uluk arguidu. arguidu mos deklara katak iha altura ne'eba arguidu seidak simu osan maibé lezada mak hanoin deit katak arguidu simu osan ona no fo hotu ba nia fen boot no lezada mos la tein meudia nian no kuandu arguidu fila ba uma hare laiha etu nune'e arguidu mos tur nonok maibe lezada makibun-ibun no tolok arguidu ba nia inan-aman, ba rakut arguidu

no lori ai-sar baku arguidu mak arguidu kaer lezada nia liman los hodi baku fali lezada nia liman refere ba lezada nia oin no hasan maizumenus dala 4.

Arguidu mos deklarara katak hafoin akontesmentu ne'e sira diak malu fali no kontinua hela hamutuk hanesan fen-laen, arguidu deklarara arepende ba nia hahalok no sei la repete iha futuru.

Lezada iha nia deklarsaun konfirma hotu deklarsaun arguidu nian no deklarara katak altura iha Ministériu Públiku ne'e nia inventa dehan arguidu tuku dala barak iha lezada nia ulun tanba altura ne'eba lezada nervozu.

Alegsaun finál

Iha alegsaun prokuradór nian, konsidera arguidu provadu komete krime ofensa ba integridade fízika simples ho natureza violénsia doméstika hasoru lezada mesmu la tuir akusaun maibe arguidu lori duni lezada nia liman baku ba iha lezada nia hasan no oin. bazei ba faktus provadu ne'e prokuradór husu batribunál atu kondena arguidu ho pena prisaun fulan 6 suspende nia ezelesaun ba tinan 2.

Defeza iha nia alegsaun husu justisa tanba arguidu konfesa arepende, diak malu ona ho lezada no arguidu kontinua responsabiliza ba lezada ho nia oan.

Desizaun

Iha julgamentu leitura sentensa ne'e, tribunál prova katak arguidu provadu lori lezada nia liman basa dala hat iha lezada nia oin hodi rezulta moras. Entertantu faktu la provadu mak arguidu tuku dala 10 iha lezada nia ulun no basa dala barak iha oin no hasan.

Bazeia ba faktus provadu no la provadu ne'e no tetu sirkunstansia hotu-hotu ne'ebé iha tribunál konklui hodi kondena arguidu ho pena prisaun fulan 6 suspende nia ezelesaun ba tinan 1 fulan 6 ho kondisaun arguidu tenki apresenta-an kada fulan durante fulan 9 ba tribunál.

6. Krime Ofensa ba integridade fízika simples ho natureza violénsia doméstika

Nú. Prosesu : 0212/21 DIBCR
Kompozisaun Tribunál : Singulár
Juis : Dr. Ivan Suritay P. Antonino Gonsalves
Prokuradór : Dr. Napolião da Silva
Defeza : Sergio Quitas
Desizaun : Absolve

Iha 11 Novembru 2022, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AMdS hasoru nia feen, iha Munisípiu Dili.

Akuzasaun prokuradór

Prokuradór akuza katak iha 17 Setembru 2021, iha oras tuku 6:00 lokraik, arguidu tuku dala tolu iha lezada nia ulun rezulta kanek, arguidu kontinua lori tudik atu tuda lezada

maibé la konsege. Antes agresaun ne'e, arguidu ho lezada diskuti malu kona-ba arguidu husu sigaru ba lezada maibé lezada la fó. Ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3 (b) no 35 (b) LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak iha akontesementu ne'e arguidu sofre hela moras mentál ho halo hela tratamentu mediku iha Ospitál, arguidu mós deklara katak altura ne'e dala ruma lahatene-an, maibé nia rekoñese katak nia tuku duni lezada nia ulun. Arguidu deklara liután katak arrepende ona nia hahalok no promete sei la kometan tan krime hanesan iha futuru.

Alende ne'e, lezada mós konfirma faktu hotu iha akuzasaun no konfirma mós ho arguidu nia deklarasaun katak iha akontesementu ne'e arguidu sofre moras mental duni no halo hela tratamentu iha ospitál tanba arguidu dala ruma tuur hamnasa mês-mesak no dala ruma lora tomak la koalia.

Alegasaun finál

Prokuradór konsidera arguidu provadu tuku dala tolu iha lezada nia ulun no lori tudik atu tuda lezada maibé la konsege, prova mós katak iha akontesementu ne'e arguidu sofre moras mental, konfirma mós husi lezada no reforsa mós husi relatório médiku nune'e husu ba tribunál atu aplika pena ne'ebé adekua ba arguidu.

Defeza iha nia alegasaun konsidera arguidu provadu komete krime hasoru lezada maibé tanba altura ne'e arguidu sofre moras mental tuir deklarasaun arguidu nia no konfirma mós husi lezada no iha mós relatório médiku, tanba ne'e husu ba tribunál atu absolve arguidu husi prosesu ne'e.

Desizaun

Depoisde avalia faktu hotu, tribunál prova katak arguidu tuku dala tolu iha lezada nia ulun rezulta kanek no prova mós katak iha akontesementu ne'e arguidu sofre moras mental no halo hela tratamentu. Bazeia ba faktu provadu hirak ne'e tribunál konklui prosesu ne'e no absolve arguidu husi prosesu ne'e.

7. Krime abuzu seksuál ba menór

Nú. Prosesu	: 0013/21 ERLET
Kompozisaun Tribunál	: Koletivu
Juis	: Dr. Alvaro M. Freitas, Dr. Jose Goncalves no Dr. Argentino Luisa Nunes
Prokuradór	: Dr. Simão Brites Seixas
Defeza	: Dra. Joana Cristina Pinto
Desizaun	: Pena prizaun tinan 7 fulan 6

Iha 11 Novembru 2022, Tribunál Distritál Dili prezide julgamentu leitura akordaun ba krime abuzu seksuál ba menór ne'ebé envolve arguidu JdS hasoru lezada GB, iha Munisípiu Ermera.

Akuzasaun prokuradór

Prokuradór akuza katak iha data ne'ebé lezada la lembra ona, maibé iha 2018, lezada no arguidu koñese malu no hahú husi koñese malu ne'e sira nain rua kria relasaun namoru durante tinan 2.

Tuir mai iha 14 Feveireiru 2019, iha loron domin nian arguidu dehan ba lezada nune'e "*amor se ó hadomi hau ita nain rua halo relasaun seksuál*", lezada konkorda ho arguidu nia pedidu ne'e no sira ba iha du'ut laran halo relasaun seksuál. Iha altura ne'e lezada foin halo tinan 13 liu seidauk kompleta tinan 14. hafoin akontesementu primeiru liu tiha fulan rua hanesan ne'e arguidu loritan lezada ba fatin hanesan hodi halo tan relasaun seksuá ho lezada ba dala rua.

Tuir fali iha 31 Dezembru 2019, bainhira lezada nia inan-aman ba tiha Dili, depoisde missa tinan foun nian remata, arguidu tuir lezada ba iha lezada nia uma aproveita lezada mesak iha uma arguidu halo tan relasaun seksuál ho lezada.

Iha investigasaun lezada deklara katak relasaun seksuál ne'e laiha koasaun ka ameasa ruma husi arguidu, relasaun ne'e akontese tanba sira nain rua hakarak malu no hadomi malu. Hafoin akontesmentu ne'e, ikus mai arguidu hakotu nia domin ho lezada. Konsekuensia husi arguidu nia hahalok ne'e, lezada lakon nia virgen, sente laiha valor no moe ba nia inan-aman no família.

Prokuradór akuza arguidu kontra artigu 177 KP kona-ba krime abuzu seksuál ba menór ho moldura penál tinan 5 to'o tinan 15 prizaun.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun no deklara katak bainhira lezada nia inan-aman hatene kona-ba arguidu ho lezada nia relasaun ne'e, família rua tuur hamutuk koalia tuir kultura Timor nian atu arguidu ho lezada hola malu hanesan feen ho laen, maibé bainhira família rua tuur hamutuk, lezada nia inan-aman husu lezada nia folin (*barlake*) US\$35,000.00 karau 2 no tua kaixa ida, nune'e arguidu nia família dehan ba lezada nia família katak sira laiha ki'ibit atu fó lezada nia folin tuir pedidu husi lezada nia família. Ho nune'e lezada nia família lori kazu ne'e mai iha tribunál. Arguidu mós deklara liután katak mezmu nune'e arguidu sei nafatin hadomi lezada no pruntu atu hola lezada.

Alende ne'e lezada mós konfirma faktu hotu iha akuzasaun no deklara katak lezada ho nia família hato'o keixa ba polísia, tanba arguidu kontaktu lezada hodi hapara sira nia relasaun namoru hafoin sira nain rua halo relasaun seksuál.

Testemuña ADM nu'udar arguidu nia aman bo'ot depoimentu katak iha prosesu rezolve problema tuir kultura nian ne'e, arguidu nia família sira konkorda hodi fó sala atu arguidu

ho lezada hola malu hanesan feen ho laen, maibé lezada nia família deside sira dame malu deit no husik deit kazu ne'e, tanba lezada nia idade sei kiik no sei kontinua eskola.

Alegasaun finál

Prokuradór haktuir katak arguidu konfesa faktu hotu iha akuzasaun no konfirma mós husi lezada, mezmú sira iha relasaun namoru maibé haree ba lezada nia idade ne'ebé sei menór no laiha esperensia ba aktu seksuál ne'ebé arguidu halo hasoru lezada, nune'e prokuradór husu ba tribunál atu kondena arguidu ho pena prizaun tinan hitu fulan neen.

Entretantu defeza husu ba tribunál atu fó pena ne'ebé justu ba arguidu tanba arguidu konfesa, arguidu mós nu'udar estudante no depoisde akontesementu ne'e arguidu sei kontinua kontaktu lezada, tanba sei hadomi lezada.

Desizaun

Depoisde avalia faktu hotu ne'ebé produs durante julgamentu, tribunál konsidera faktu hotu provadu. Bazeia ba faktu provadu sira ne'e tribunál konklui prosesu ne'e no kondena arguidu ba kada akontesementu ho pena prizaun tinan lima, pena mínimu tinan lima no masimu tinan sanolu resin lima prizaun husi akumulasaun pena masimu no minimu, tribunál konklui hodi kondena arguidu ho pena unika tinan hitu fulan neen prizaun.

8. Krime explorasaun ba jogu ilísitu

Nú. Prosesu : 0248/22.PNSIC

Kompozisaun Tribunál : Singulár

Juis : Dr. Argentino Nunes

Prokuradór : Dr. Jacinto Babo Soares

Defeza : Dr. Arlindo Sanches, Dr. Cancio Freitas, Dr. Januario

Martins, Dr. Miguel Faria no Dr. Jose Pedro Camoes (Advogado Privadu)

Desizaun : Pena multa US\$500.00

Iha 21 Novembru 2022, Tribunál Distritál Dili prezide julgamentu ba krime explorasaun ba jogu ilísitu ne'ebé envolve arguidu Huang Leong Rui, Alfredo M.A. Ferreira, Guo Long Guo, Dedi Irfan hasoru Estadu RDTL, iha Munisípiu Dili.

Akuzasaun Prokuradór

Prokuradór akuza katak iha 21 Novembru 2022, iha oras tuku 5:30 lokraik, ekipa konjunta ne'ebé kompostu husi Polísia Nasionál investigasaun Kriminál (PNSIC) ho diresaun ba inspenasaun jogu, halo intervensaun/inspenasaun direita ba kompãnia Toto Bola ho naran Funspotaan Ball Unipessoal Lda ne'ebé mak lokaliza iha Aimutin, Delta IV, no identifika katak kompãnia Toto Bola Funspotaan Ball Unipessoal Lda hala'o hela aktividade jogu Toto Bolla iha fatin refer no bainhira ekipa konjunta halo verifikasaun ba dokumentu sira deskobre kompãnia refere laiha lisensa ba autorizasaun ba hala'o jogu. Arguidu Dedy Irfan nu'udar jerente/manager, deklara katak aktividade ida ne'e sira hala'o sein autorizaun ka lisensa husi governu.

Prokuradór akuza arguidu sira kontra artigu 322 KP kona-ba explorasaun ba jogu ilísitu ho moldura penál tinan 3 ka multa no artigu 30 KP kona-ba autoria.

Produsaun ba prova sira

Iha prosesu julgamentu, arguidu Huang Leong Rui deklara katak loos duni kompañia ne'e seidauk hetan lisensa ka autorizasaun husi governu.

Arguidu Alfredo M. A. Ferreira deklara katak kompañia ne'e uza arguidu nia naran, maibé hahú ho jogu Toto Bolla ne'e arguidu lahatene.

Arguidu Guo Long Guo deklara katak nia hanesan kolega diak ho arguidu Huang Leong Rui hodi halo tradusaun ba lingua Indonézia, tanba arguidu Huang Leong Rui lahatene lingua Indonézia, no arguidu laos empresario ba kompañia refere.

Arguidu Dedy Irfan, hanesan manager iha kompañia refere maibé nia lahatene kona-ba lisensa ne'e tanba nia laiha kuñesementu ba lingua tetun oinsa atu halo lisensa ne'e. Arguidu mós deklara katak aktividade ne'e hahú iha 18 Novembru 2022.

Alegasaun finál

Prokuradór konsidera arguidu sira provadu komete krime ne'ebé akuza ba sira, nune'e husu ba tribunál atu kondena arguidu Huang Leong Rui ho pena multa US\$500.00, enkuantu ba arguidu nain tolu seluk husu ba tribunál atu kondena arguidu sira ho pena multa US\$200.00.

Enkuantu defeza haktuir katak arguidu sira la komete krime ne'ebé ninia pena aas, tanba ne'e husu ba tribunál atu absolve arguidu husi prosesu ne'e.

Depoisde rona tiha alegasaun, tribunál decide liberta arguidu sira husi detensaun 72 oras.

Desizaun

Depoisde avalia faktu hotu, tribunál prova katak arguidu Huang Leong Rui mak provadu komete krime explorasaun ba jogu ilísitu. Enkuantu arguidu tolu seluk tribunál konsidera la provadu komete krime refere.

Bazeia ba faktu provadu hirak ne'e, tribunál konklui prosesu ne'e no kondena arguidu Huang Leong Rui ho pena multa US\$500.00, ne'ebé kada lora arguidu sei selu US\$5.00, durante lora 50, durante 15 dias arguidu la kumpri pena multa refere, tribunál sei kondena arguidu ho pena prizaun.

9. Krime ofensa ba integridade física simples ho natureza violência doméstica

Nú. Prosesu : 0047/20.ERERM
Kompozisaun Tribunál : Singulár
Juis : Dr. Ivan Antonino Patrocino Gonçalves
Prokuradór : Dr. Simeão B. Seixas
Defeza : Dr. Jose Maria Guterres
Desizaun : Pena prizaun fulan 9 suspende ba tinan 1

Iha 21 Novembru 2022, Tribunál Distritál Dili prezide julgamentu leitura sentensa ba

krime ofensa ba integridade física simples ho natureza violéncia doméstika ne'ebé envolve arguidu EdSM hasoru nia feen, iha Munisípiu Ermera.

Akuzaun prokuradór

Prokuradór akuza katak iha 13 Dezembru 2022, iha oras tuku 9:00 dadeer, lezada ne'ebé ho kondisun isin rua fulan tolu tanba kolen, haneruk hela ahi iha dapur laran lakleur arguidu tama ba dapur laran la koalia buat ida hodi basa dala rua iha lezada nia hasan, tuku dala ida iha lezada nia matan fukun parte karuk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Tribunál la konsege notifika arguidu, tanba arguidu edital nune'e iha produsaun ba prova la rona arguidu nia deklarasaun.

Aliende ne'e, lezada kontinua kofirma ba faktu hotu iha akuzasaun no lezada mós deklarata katak antes ne'e arguidu mós sempre halo agresaun hanesan hasoru lezada. Arguidu no lezada hela fahe malu (*separa*) to'o ohin loraun.

Alegasaun finál

Prokuradór haktuir katak, mezmú arguidu la marka prezensa, maibé lezada kontinua kofirma faktu hotu iha akuzasaun katak arguidu halo duni agresaun hasoru lezada no antes ne'e mós arguidu sempre halo agresaun hasoru lezada, ho nune'e husu ba tribunál atu kondena arguidu ho pena prizaun fulan neen suspende ba tinan ida.

Defeza husu ba tribunál atu fó pena ne'ebé adekuaudu ba arguidu tanba bazeia ba deklarasaun lezada nian katak maske sira hela fahe malu ona maibé lezada la rai odio ba arguidu.

Desizaun

Depoisde avalia faktu hotu, tribunál prova katak arguidu basa dala rua iha lezada nia hasan, tuku dala ida iha lezada nia matan fukun parte karuk no arguidu mos sempre halo agresaun hasoru lezada.

Bazeia ba faktu provadu sira ne'e tribunal konklui prosesu ne'e no kondena arguidu ho pena prizaun fulan sia suspende ba tinan ida.

10. Krime ofensa ba integridade física simples ho natureza violéncia doméstika

Nú. Prosesu	: 0115/21.ERCIK
Kompozisaun Tribunál	: Koletivu
Juis	: Dr. Ivan. P. Antonino Gonçalves
Prokuradór	: Dr. Simão Seixas
Defeza	: Dr. Manuel Sarmento
Desizaun	: Pena multa US\$135.00

Iha 29 Novembru 2022, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika envolve arguidu FM hasoru nia feen, iha Munisípiu Ermera.

Akuzasaun Prokuradór

Prokuradó akuza katak iha loron ne'ebé la apura maibé iha tinan 2021, iha oras maiszumenus tuku 21:00 kalan, arguidu basa dala ida iha lezada nia hasan, tebe dala ida iha lezada nia kanotak, lori kapaseti tuda iha lezada nia liman. Antes agresau ne'e, arguidu ho lezada diskute malu kona-ba lezada foti arguidu nia osan US\$1.00, iha armariu laran. Ho nune'e mosu agresau hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha produsaun ba prova, arguidu konfesa faktu hotu iha akuzasaun no deklara katak moris separa ona ho lezada.

Alende ne'e, lezada kontinua konfirma faktu hotu iha akuzasaun no deklara katak momentu ne'ebá arguidu haruka nia alin mak ba foti osan US\$1.00 atu ba sosa matabisu maibé ikus arguidu dun fali ba lezada. Arguidu nia hahalok ne'e rezulta lezada moras durante loron rua no latama serbisu.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, ho nune'e husu tribunál atu kondena arguidu ho pena prizaun fulan ualu suspende ba tinan ida fulan neen.

Alende ne'e defeza konkorda ho alegasaun prokuradór nian, atu kondena arguidu ho pena prizaun fulan ualu suspende ba tinan ida fulan neen.

Desizaun

Depoisde avalia faktu hotu, tribunal prova katak arguidu basa dala ida iha lezada nia hasan, tebe dala ida iha lezada nia kanotak, lori kapaseti tuda iha lezada nia liman.

Bazeia ba faktu provadu hirak ne'e hotu, tribunál konklui prosesu ne'e no kondena arguidu ho pena multa US\$135.00, ne'ebé kada loron sei selu 0,75 sentavus durante loron 125. Tribunal mós fiksa pena alternativa durante loron 180 bainhira arguidu la kumpri pena multa refere.

11. Krime ofensa ba integridade fízika simples ho natureza violénsia doméstika

Nú. Prosesu

: 0189/21.DINFT

Kompozisaun Tribunál : Singulár
Juis : Dr. Ivan patricinio Antonino Gonçalves
Prokuradór : Dr. Napoleão^[L]_[SEP] da Silva
Defeza : Dr. Jose Maria Guterres
Desizaun : Pena multa US\$30.00

Iha 29 Novembru 2022, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MB hasoru nia feen, iha Munisípiu Dili.

Akuzasaun Prokuradór

^[L]_[SEP]Prokuradór akuza katak iha 19 Novembru 2021, iha oras tuku 21:00 kalan, arguidu tuku dala ida iha lezada nia ibun no tuku dala ida iha lezada nia ulun fatuk, arguidu nia asaun ne'e rezulta lezada konsege ba halo tratamentu iha ospitál. Antes agresaun ne'e, arguidu ho lezada diskute malu kona-ba arguidu haruka lezada buka arguidu nia faru atu hatais ba festa, maibé lezada buka la hetan.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun. Arguidu mós rekoñese nia hahalok ne'e la di'ak no deklara mós katak depoisde akontesimentu ne'e arguidu la baku ona lezada. Arguidu la serbisu maibé halo atividade faan modo ho rendimentu loron ida boot liu hetan US\$25 no kiik liu mak US\$2.50 kada loron 1. Arguidu deklara mós katak agora sira diak malu ona no kontinua moris hamutuk hanesan feen ho laen. ^[L]_[SEP]

Alende ne'e, lezada mós kontinua konfirma faktu hotu iha akuzasaun no deklara katak. Depoisde problema ne'e, arguidu husu ona deskulpa no la baku tan ona lezada.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, nune'e husu ba tribunál atu kondena arguidu ho pena prizaun fulan neen no suspende ba tinan ida.

Enkuantu defeza husu ba tribunál atu konsidera arguidu nia sirkunstánsia atenuante sira hanesan arguidu konfesa, arrepende nia hahalok, diak malu ona ho lezada no sira kontinua moris hamutuk hanesan feen ho laen. Nune'e husu tribunál atu kondena arguidu ho pena ne'ebé kmaan.

Desizaun

Depoisde avalia faktu hotu, tribunál prova katak arguidu tuku dala ida iha lezada nia ibun no tuku dala ida iha lezada nia ulun.

Bazeia ba faktu provadu hirak ne'e no tetu mos ho sirkunstánsia atenuante sira hanesan arguidu konfesa, arrepende nia hahalok diak malu ona ho lezada no sira kontinua moris hamutuk hanesan feen ho laen, nune'e tribunál konklui prosesu no kondena arguidu ho pena multa US\$30.00, ne'ebé kada loron arguidu sei selu 0,50 sentavus durante loron 60. Tribunál mós fiksa pena alternativa durante loron 15 bainhira arguidu la kumpri pena multa refere.

12. Krime furtu simples no krime falsifikasaun ba dokumentu ka notasaun téknika

Nú. Prosesu : 0112/22.DCMR
Kompozisaun Tribunál : Koletivu
Juis : Dra. Maria Solana, Dr. Ivan Gonçalves no Dr. Antonio Foseca
Prokuradór : Dr. Amrozi Rangel Freitas
Defeza : Dr. Sebastião Amado de Almeida
Desizaun : Pena prizaun tinan 3 suspende ba tinan 3

Iha 23 Novembru 2022, Tribunál Distritál Dili prezide julgamentu leitura akordaun ba Krime furtu agravadu no krime falsifikasaun dokumentu ne'ebé envolve arguidu Agosto Correia hasoru lezadu Housvaldo Castelo Dasilva Coelho, iha Munisípiu Dili.

Akuzasaun Prokuradór

Prokuradór akuza katak iha 26 Feveireiru 2022, arguidu foti uluk lezadu nia xavi motor rezerva ida sein fó hatene ba lezadu.

Tuir mai iha 27 Feveireiru 2022, maizumenus iha dadeer, arguidu hader uluk no halo moris motor lori sai motor sein fó koñesementu ba lezadu, arguidu kondus lezadu nia motor Yamaha Jupiter ho xapa matrikula D.8188 TL ba Tibar atu faan ho osan US\$500.00, maibé ema la sosa hafoin ema balun foto iha loron ne'e kedas no públika iha media sosial tanba ne'e arguidu lori fila motor refere ba arguidu nia uma, maibe la lori too uma no arguidu para deit motor iha Estrada Igreja Aimutin nia oin hafoin arguidu lao ain deit ba uma. Ho nune'e Lezadu mós telefone arguidu hodi konfirma katak arguidu mak uza lezadu nia motor no arguidu hatan iha telfone katak *"la lori motor no la hatene motor iha ne'ebé"*.

Prokuradór akuza arguidu kontra artigu 252 (2) KP kona-ba furtu agravadu ho moldura penál tinan 2 too tinan 8 prizaun no artigu 303 (1) KP kona-ba falsifikasaun ba dokumentu ka notasaun téknika ho moldura penál tinan 2 too tinan 6 prizaun.

Produsaun ba prova sira

Iha julgamentu, arguidu konfesa katak faktu sira ne'ebé akuza ba arguidu ne'e loos hotu no depoisde akontesementu ne'e arguidu rasik mak intrega an ba polísia. Arguidu deklarara mós katak arrepende ona nia hahalok no promete sei la komete tan krime hanesan iha futuro. Arguidu foti lezadu nia motor ho objetivu atu hetan osan hodi uza ba nia nesiedade sira no trata pasaporte Portugal nian.

Alende ne'e lezadu mós konfirma faktu hotu iha akuzasaun no deklarata katak iha momentu ne'eba laos lezadu mak ba hato'o, maibe arguidu mak ba no bainhira polisia kontaktu lezada, lezada ba iha Estasaun Polisia Aimutin klarifika tiha mak polisia foin hatene katak mak arguidu naok lezada nia motor, ho nune'e polisia detein arguidu. Lezada deklarata liutan katak motor ne'e lezada sosa ho folin US\$500.00, no motor ne'e agora lezada uza hela.

Alegasaun final

Prokurador konsidera arguidu provadu komete krime ne'ebe prokurador akuza ba arguidu, bazeia ba konfisaun arguidu nian no konfirma mós husi lezada, nune'e atu prevene krime ne'e akontese tan iha futuru husu ba tribunál atu kondena arguidu ho pena prizaun tinan sia.

Entretantu defeza husu ba tribunál atu kondena arguidu ho pena ne'ebe adekua ho konsiderasaun katak, arguidu konfesa arrepende ona nia hahalok no kona-ba furtu agravadu konsidera la relevante ho valor prejuizu ne'ebe iha tanba motor ne'ebe lezadu foti entrega ona ba lezadu no valór osan hodi sosa motor iha momentu ne'eba tuir deklarasaun lezadu nian US\$500.00 no konfirma mós husi testemuña, tanba ne'e defeza husu ba tribunál atu halo alterasaun husi artigu 252 KP kona-ba furtu agravadu ba fali artigu 251 KP kona-ba furtu simples.

Desizaun

Depoide avalia faktu hotu ne'ebe produs durante julgamentu tribunál prova katak arguidu foti duni lezadu nia motorizada sein kuñesimentu lezadu nian.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ona nia hahalok, arguidu rasik mak apresentaan iha polisia no depoide ne'e arguidu entrega fali motorizada refere ba iha arguidu. Ho nune'e tribunál konsidera defeza ninia pedidu hodi halo alterasaun husi artigu 252 KP kona-ba furtu agravadu ba fali artigu 251 KP kona-ba furtu simples, tribunál konklui prosesu ne'e no kondena arguidu ba krime furtu simples ho pena prizaun ho pena prizaun fulan ualu no ba krime falsifikasaun ba dokumentu ka notasaun téknika tribunál kondena arguidu ho pena prizaun tinan rua fulan ualu. Tribunál halo akumulasaun ba pena husi krime rua ne'e hodi kondena arguidu ho pena prizaun tinan tolu suspende ba tinan tolu.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl